

四庫全書

集部

欽定四庫全書

石湖詩集卷十一

宋 范成大 撰

己丑五月被召至行在遇周畏知司直和五年前

送周歸弋陽韻見贈復次韻荅之

以下自處州再至行在作

分袂悠悠爾許年莫嗔蓬鬢兩蕭然酒槽不奈青春老
經筭空供白晝眠暗綠千章新活計軟紅三尺舊塵緣
相逢且作西湖客山繞荷花樣畫船

次韻馬少伊郁舜舉寄示同游石湖詩卷七首

蕪城老蘚不知春，忽有柴門月色新。
芝草琅玕無鎖鑰，自無超俗扣門人。

莫問朝歌與棘津，浮生惟有一杯春。
君看百戰功名地，越戍吳臺兩窖塵。

鏡面波光倒碧峰，半湖雲錦萬芙蓉。
去年蕩槳香風裏，行傍石橋花正濃。

紅皺黃團熟暑風，甘瓜削玉藕玲瓏。
身謀已落園丁後，

滿帽京塵日正中

兩賢風度藹春陽
步履隨風上柳塘
綵筆紅牋芳徑裏
句中挾我萬花香

得得來題小隱詩
拂花紫柳画船移
湖邊好景春猶未
須到秋清月滿時

瀟洒王郎亦勝流
今年何事阻清遊
當家風味今如此
孤負山陰夜雪舟

王必大獨不赴
二公同遊之約

玉堂寓直

摘文窓戶九霄中岸幘燒香愧老農上直馬歸催下鑰
傳更人唱促鳴鐘金城巖崿雲千雉碧瓦參差月萬重
骨冷魂清都不夢玉階蕭瑟聽秋蛩

己丑中秋寓宿玉堂聞沈公雅大卿劉正夫戶部

集張園賞月走筆寄之

笑看收雲捲雨忙沉沉宮樹納空光夜長來伴玉堂宿
天近似聞丹桂香鵲樓欄浮瑞氣鳳凰城闕帶新涼
遙知勝絕西園會也憶車公對舉觴

八月二十二日寓直玉堂雨後頓涼

雨意蒸雲暗夕陽濃薰滿院落花香題詩弄筆北窓下
將此工夫報荅涼

次韻荅吳江周縣尉飲垂虹見寄

垂虹亭上角巾傾鬣怒龍吟醉不聽安得對君浮大白
想應嗤我汗新青夢魂舞蝶隨春草時節賓鴻點暮汀
湖海扁舟須及健莫教明月照星星

次韻徐廷獻機宜送自釀石室酒三首

元亮折腰嘻已久故山應有欲蕪田因君辦作送酒客
憶我北窓清晝眠

清絕仍香如橘露甘餘小苦似松肪官槽重濁那知此
付與街頭白面郎

一語為君評石室三杯便可博涼州百年兀兀同渠住
何處能生半點愁

玉堂寓直曉起書事記直舍老兵語

江湖垂釣手天漢搗文堂魂清不得眠室虛自生光曉

緯澹天闕江濤隱胡牀傳呼九門開奔走千官忙若若
誇組綬紛紛夢黃梁微聞鈴下騶竊議馬上郎但計夢
長短寧論已行藏

與長文正夫游北山

柳岸松門勝處通馬蹄踏霧入空濛春寒有力欺遊子
天色無情沒斷鴻雨脚遠連山脚暗杏梢斜倚竹梢紅
駝裘擁鼻吾衰矣年少猶嫌料峭風

致政承奉盧君挽詞二首

德華父

泮水橋門識太平歸來霜鬢老柴荆淹中學邃方成傳
谷口名高豈待卿黃壤無情埋玉樹青衫有道勝金籬
襄陽耆舊今蕭索惟有松風到晚清

純孝當年有護持赤眉那敢近姜詩眼看庭玉成名後
身及堂萱未老時湖海青鞵驚斷夢風霜丹旆挂新悲
尊前五客今誰在愁絕廬山十段奇

寓直玉堂拜賜御酒

歸鴉陸續墮宮槐簾幙參差晚不開小雨遂將秋色至

長風時送市聲來近瞻北斗璿璣次猶夢西山翠碧堆
慚愧君恩來甲夜殿頭宣勸紫金杯

送汪仲嘉侍郎使金分韻得待字

聖人坐明堂洪覆等穹蓋歲頒兩玉節前後歌出塞公
才有廊廟安用試專對要煩第一人鎮撫大荒外嫩寒
欺別酒微月見征旆遙知燕山雪飄灑漢冠佩玉色照
穹廬驕子亦心醉要領一笑得歸來安鼎鼎是時春正
佳湖上花如海清遊不可遲日日樣船待

李暈知縣作亭西湖上余用東坡語名之曰飲綠
遂為勝槩

芷葺蓮巢喚客遊
蘆簾席帽為君留
未論吹水堪添酒
且要移牀學枕流
乍霽却陰梅釀雨
暫暄還冷麥催秋
石湖也似西湖好
煩向蒼烟問白鷗

草蟲扇

莫嫌絡緯股鳴悲
解向寒牕促曉機
海眼多花無藉在
顛狂只待學于飛

送汪仲嘉待制奉祠歸四明分韻得論字

丹霄碧海眇高騫
厭直承明却自論
寶馬十年聽漏箭
扁舟一雨看潮痕
侍臣相憶松門遠
歸客還憐菊徑存
清潤要非山澤相
又煩一札下雲根

魯如晦郎中挽詞二首

術業推游刃功名苦溯洄
著鞭孤壯志籌算老奇才
星省龐眉去雲山袖手來
知公了時命何必誅餘哀

自古歸來引于今遂隱篇
碁燈熒夜觀歌板聒春船
陳

迹空華似佳城露草邊寂寥難黍約望眼一潸然

初約鄰人至石湖

以下辛卯自西掖歸吳作

窈窕崎嶇學種園此生丘壑是前緣
隔離日上浮天水當戶山橫匝地烟
春入葑田蘆綻筍雨傾沙岸竹垂鞭
荒寒未辦招君醉且吸湖光當酒泉

社日獨坐

海棠雨後沁臙脂楊柳風前撚綠絲
香篆結雲深院靜去年今日燕來時

與周子充侍郎同宿石湖

幽香馥蕙帳清夢安且吉
蘿月墮蒼茫松風隱蕭瑟
曉禽啄且鳴喚我起盥櫛
鉤窓納雲濤灩灩浴初日
金鉏忽騰上倒景落書帙
佳晴有新課曬種催執耒
從今不得間東臯草過膝

和周子充侍郎見寄樂府戲贈之作

釣海風水急登樓塵霧高
不如岸綸巾春船攜小橋
芳草含竒薰光景上東壁
桂林那辦此辦作安昌客

壬辰三月十八日石湖花下作

夜飲海棠月朝漱山茶露臞儒槁木形受用侈如許荆
扉隔黃塵誰識花島路惟有瘦筇枝共飽園中趣林神
釀餘春政爾美無度葱蘢千萬重芳意未渠暮風香薦
秀色鼎俎謝腥腐雖無稻粱謀捫腹有餘飫

刈麥行

梅花開時我種麥桃李花飛麥叢碧多病經旬不出門
東陂已作黃雲色腰鎌刈熟趁晴歸明朝雨來麥沾泥

犁田待雨插晚稻朝出移秧夜食麩

壬辰天中節赴平江錫燕因懷去年以侍臣攝事

捧御盃殿上賦二小詩

去歲排場德壽宮薰風披拂酒鱗紅小臣供奉金龍醖
親到虛皇玉座東

天中織動玉輿來萬歲三聲徹九街想見牙牀當殿過
舜裳雲委拜堯階

壬辰七月十六日侵晨真率會石湖路中書事

白葛烏紗稱老農
溪南溪北水車風
稻頭的皪粘朝露
步入明珠翠網中

次韻施進之惠紫芝術

山精媒長生仙
理信可詰梨棗本
寓言杞菊亦凡質
幽人愛臞儒藥鼎
薦珍物絕粒謝烟
火耘苗換肌骨摩
挽萊蕪甑塵生不
須拂

題醉道士圖

蜩鷃鵬鴒任過前
壺中春色瓮中天
朝來兀兀三杯後

且作人間有漏仙

五雜組四首

并序

古樂府有五雜組及兩頭纖纖殆類酒令孔平仲最愛作此以為詩戲亦效之

五雜組同心結往復來當窓月不得已話離別

五雜組流蘇縷往復來臨行語不得已上馬去

五雜組回文機往復來錦梭飛不得已獨畫着

五雜組綵絲鍼往復來鳥投林不得已夢孤衾

兩頭纖纖二首

兩頭纖纖探官繭半白半黑鶴氅緣
脇脇膊膊上帖箭
磊磊落落落封侯面

兩頭纖纖小秤衡半白半黑月未明
脇脇膊膊扣戶聲
磊磊落落落金盤冰

再賦五雜組四首

五雜組綬若若徃復來大車鐸不得已去丘壑

五雜組侯門戟徃復來道上檄不得已天涯客

五雜組漢旆旆往復來賓鴻字不得已餐羶使
五雜組非烟雲往復來朝馬塵不得已嬰龍鱗

夜坐聽雨

四檐密密又疎疎聲到蒲團醉夢蘇恰似秋眠天竺寺
東軒窗外聽跳珠

寒夜獨步中庭

忍寒索句踏霜行刮面風來鬚結冰倦僕觸屏呼不應
梅花影下一窓燈

會散夜步

忘却下樓扶我誰接離顛倒酒沾衣貪看雪樣滿街月

不上籃輿步砌歸

步砌吳語也

孟嶠之家姬乞題扇二首

輕雲翠英

輕烟小雨釀芳春草色連天綠似裙斜日滿樓人獨望
斷鴻飛入萬重雲

翠袖凌寒弄月明梅花影下醉三更一天風露誰驚覺
寂寞空杯綴落英

周畏知司直得湖南帥屬過吳門復用己丑年倡
和韻贈別

邂逅婆婆失少年劇談抵掌尚超然君猶拄笏看山去
我且披蓑聽雨眠京洛分襟疑後會江吳把酒悟前緣
暫來忽去都如夢疑是陳卿竹葉船

偶書

以下十五首三十年前所作續得殘藁附此卷末

伯勞東去燕西飛同寄春風二月時可恨同時不同調
此情那得更相知

雙燕

底處飛雙燕銜泥上藥欄莫教驚得去留取隔簾看

戲題牡丹

主人細意惜芳春寶帳籠塔護紫雲風日等閒猶不到
外邊蜂蝶莫紛紛

春日三首

藥欄花煖小鴝眠雪白晴雲水碧天煮酒青梅寒食過
夕陽庭院鎖鞦韆

西窓一雨又斜暉
睡起薰籠換夾衣
莫放珠簾遮洞戶
從教燕子作雙飛

雙鯉無書直萬金
畫橋新綠一篙深
青蘋白芷皆愁思
不獨江楓動客心

高樓曲

以下六首皆
夢境所得

歲暮天涯客
黃昏蝙蝠飛
高樓人不到
小雨怯單衣

湘江怨

蘋芷迷烟路
蓮舟忘却歸
夜寒江水黑
風雨夢如飛

採蓮三首

溪頭風迅怯單衣
兩槳凌波去似飛
折得蘋花雙葉子
綠鬟撩亂帶香歸

藕花深處好徘徊
不奈華筵苦見催
記取南涇茭葉露
月明風熟更重來

柔櫓無聲坐釣魚
浪花飛點翠羅裾
空江日暮無來客
腸斷三湘一紙書

弔陳叔寶詞

賞心亭上再來遊
烟月迷人獨自愁
行到江邊無去路
却隨潮水過揚州

石湖詩集卷十一

欽定四庫全書

石湖詩集卷十二

宋 范成大 撰

渡淮

八月十一日渡盱眙
過泗州順風如飛

船旗袞袞徑長淮
汴口人看撥不開
昨夜南風浪如屋
果然雙節下天來

汴河

汴自泗州以北皆涸草木生之土
人云本朝恢復駕回即河須復開

指顧枯河五十年
龍舟早晚定䟽川
還京却要東南運

酸棗棠梨莫蓊然

虞姬墓

在虹縣下馬鋪北三十七里

劉項家人總可憐
英雄無策庇嬋娟
戚姬葬處君知否
不及虞兮有墓田

宿州

五更出城
鬼火滿野

狐鳴鬼嘯夜茫茫
元是官軍舊戰場
土伯不能藏碧燐
三三兩兩照前岡

雷萬春墓

在南京城南環以小牆
榜曰忠勇雷公之墓

九隕元身不隕名言言千載氣如生欲知忠信行蠻貊
過墓行人下馬行

雙廟

在南京北門外張巡許遠廟也
世稱雙廟南京人呼為雙王廟

平地孤城寇若林兩公猶解障妖祲大梁襟帶洪河險
誰遣神州陸地沉

睢水

睢口石門已隕河亦塞
即項羽大敗漢兵處

一戰填河擁漢屯拔山意氣已鯨吞直南即是陰陵路
兵果難將勝負論

伊尹墓

在空桑北一里有磚堦刻云湯相伊公之墓相傳墓左右生棘皆直如矢

三尺黃廬直棘邊此心終古享皇天汲書猥述流傳妄

剖擊嗟無咎單篇

留侯廟

在陳留縣中案王原叔諸家攷子房所封乃彭城留城非陳留也自宋武下教修復

時其失久矣

功成輕舉信良謀心與鷗夷共一舟呂媪區區無鳥喙

先生輕負赤松遊

西瓜園

味淡而多液本燕北種今河南皆種之

碧蔓凌霜卧軟沙年來處處食西瓜形模濩落淡如水
未可蒲萄苜蓿誇

宜春苑

在舊宋門外
俗名東御園

狐塚攏蹊滿路隅行人猶作御園呼連昌尚有花臨砌
腸斷宜春寸草無

京城

倚天擲擲萬樓棚聖代規模若化成如許金湯尚資盜
古來李勣勝長城

護龍河

在新宋門外中有網船數十艘

新郭門前見客舟清連淺淺抱城樓六龍行在東南國
河若能神合斷流

福勝閣

曹太皇所建奇崛冠京城中

翬飛五級半空翔指點樓欄說太皇劫火不能侵願力
巋然獨似漢靈光

相國寺

寺榜猶祐陵御書寺中雜貨皆商俗所需而已

傾檐缺吻護奎文金碧浮圖暗古塵聞說今朝恰開寺

羊裘狼帽趁時新

州橋

南望朱雀門北望宣德樓皆舊御路也

州橋南北是天街父老年年等駕廻忍淚失聲詢使者

幾時真有六軍來

宣德樓

金人加崇華改曰承天門

曉闕叢霄舊玉京多年淪陷最傷神何時得作清宮使

重睹承平五鳳城

市街

京師諸市皆荒索僅有人居

施行訛雜馬行殘藥市蕭騷土市寒惆悵軟紅佳麗地
黃沙如雨撲征鞍

金水河

在舊封丘門外河中
多大石皆良歎所蹟

菜市橋西一水環宮牆依舊俯清灣誰憐磊磊河中石
曾上君王萬歲山

壺春堂

徽廟稱道君時所居在顯芳
園中俗呼為八滴水閣者

松漠丹成去不歸龍髯無復有攀時芳園留得酥稜在
長與都人作淚垂

漸水

黃河將決其地則伏流先出名曰漸水河身日徙而南過封丘至胙城界中已有漸水去

汴京大約五十里耳

黃流日夜向南風道出封丘處處逢紫蓋黃旗在湖海
故應河伯欲朝宗

李固渡

洪河萬里界中州倒捲銀潢聒地流列弩燔梁那可渡
向來天數亦人謀

天成橋

碑石蔡京書在濬州岡上驛中東廡下舊浮橋在此今河徙南行矣

一岡邑屋舊河灘却望河身百里間湧土漲沙漫白道
天成橋石在高山

舊滑州

在潞州側積水中為河所淪久矣
大伾即黎陽山西望積水不遠

大伾山麓馬徘徊積水中間舊滑臺漁子不知興廢事
清晨吹笛掉船來

扁鵲墓

在湯陰伏道路傍相傳墓上土可
療病禱而求之或得小圓如丹藥

活人絕技古今無名下從教世俗趨墳土尚堪充藥餌
莫嗔醫者例多盧

姜里城

在姜河上
四垣儼然

陵谷遷移尚故墟
天盈商罪未蠲除
古今行客同嗤罵
何止三篇泰誓書

文王廟

在姜里
城南

堂堂十亂欲興周
肯使君王死作囚
巧笑入宮天亦笑
可憐元不費深謀

相州

推車老人自言
吾州韓魏
公鄉里南北兩墳尚無恙

禿巾髻髻老扶車
茹痛含辛說夢華
賴有鄉人聊刷恥

魏公元是魯東家

秦樓

在相州寺中上有貴人幕而觀使客云是郡主太守之妻也大抵相臺傾城出觀異於他

州

攔街看幕似春遊
斑犢雕車碧畫油
奚女家人稱貴主
縷金長袖倚秦樓

翠樓

在秦樓之北樓上下皆飲酒者

連袵成帷迓漢宮
翠樓沽酒滿城歡
白頭翁媼相扶拜
垂老從今幾度看

講武城

在漳河上曹操所築周遭十數里鑿城為道而過

阿瞞虢武蓋劉孫千古還將鬼蜮論縱有周遭遺堞在不如魚復陣圖尊

七十二塚

在講武城外曹操疑塚也森然彌望北人比常增封之

一棺何用塚如林誰復如公負此心聞說北人為封土世間隨事有知音

趙故城

在邯鄲縣南延袤數十里

金石笙篳絕代無鼙鼙藜藿正乘除園翁但愛城泥煖

侵早鋤霜種晚蔬

邯鄲道

即昔人作黃梁夢處

薄曉霜侵使者車邯鄲阪峻且徐驅困來也作黃梁夢不夢封侯夢石湖

藺相如墓

在邯鄲縣南趙故城之西

玉節經行障塞深馬頭醺酒奠疎林茲行壁重身如葉
天日應臨慕藺心

邯鄲驛

驛後有磔犬祭天者大抵盡為喬俗漢戚夫人縣人也

長安大道走邯鄲倚瑟佳人悵望間
遠嫁更憐邊塞苦
琵琶馬上憶關山

叢臺

在邯鄲北門外

憑高閱士劒如林故國風流變古今
絃服雲仍猶左袵
叢臺休恨綠蕪深

臨洺鎮

去洺州三十里洺酒最佳
伴使以數壺及新兔見餉

竟日霜寒暮解圍融融桑柘染斜暉
北人爭勸臨洺酒
云有棚頭得兔歸

邢臺驛

信德府驛也去太行最近城外有荷塘柳隄頗清麗不類河朔

太行東麓照邢州萬疊烟螺紫翠浮誰解登臨管風物

枯荷老柳替人愁

柳公亭

在邢州城北小園中伴使邀客入遊云舊有流杯今廢園正對太行馬鞍一峰極峯

萃

主人敬客有餘情催喚繩牀坐柳亭曲水流觴非故物
馬鞍山色舊青青

內丘梨園

內丘鵝梨為天下第一初熟收藏十月出汗後方佳園戶云梨至易種一接便

生可支數十年吾家園
者猶聖宋太平時所接

汗後驚梨爽似冰花身耐久老猶榮園翁指似還三嘆

曾共翁身見太平

大寧河

在內丘北河之東皆
梨棗園二果正熟

梨棗從來數內丘大寧河畔果園稠荆箱擾擾攔街賣

紅皺黃團滿店頭

北人謂道上
聚落為店頭

柏鄉

唐志堯山乃古柏仁俗
傳或以此柏鄉為柏人

貫生名壓漢公卿自古逢讎不反兵仇敵滔天無敢動

柏鄉空濶迫人名

唐山

即堯山金主之父名宗堯
改山名山下有放勲廟

勲唐遺德照清灣百聖聞風不敢班底事遺名遭變易
何人知道是堯山

光武廟

在柏鄉北兩壁有二十八將像廟前有二
石人皆自腰而斷俗傳光武夜過以為生

人問途不應
劒斬之云

雲臺列像拱真人野老猶誇建武春不用劒鋒能刺石
冰河一瞥已通神

趙州石橋

在城南汶河上以鐵筍卯貫石捲運不類人工

石色如霜鐵色新
汶河南北尚通津
不因再度皇華使

誰洗奚車塞馬塵

柏林院

即東院趙州禪師道場在城中

邊塵一起劫灰深
風鼓三灾海印沈
急過當年無佛處

庭前空有柏森森

樂城

縣極草草伴使怒頓餐不精欲榜縣令跪告移時方免

顏垣破屋古城邊
客傳蕭寒燹不烟
明府牙緋危受杖

藥城風物一淒然

呼沱河

即光武渡冰處
在真定南五里

聞道河神解造冰曾扶陽九見中興如今爛被風塵浣
不似滄浪可濯纓

真定舞

商樂悉變中華惟真定有京
師舊樂工尚舞高平曲破

紫袖當棚雪鬢凋曾隨廣樂奏雲韶老來未忍看婆舞
猶倚黃鐘袞六么

東坡祠堂

在中山府學
學在化原坊

化原坊裏尚黌堂聞道蘇仙有奉嘗想見當年行樂處
牙旗鐵馬照金章

松醪

中山酒猶名
松醪然甚滿

松風漱罷讀離騷翰墨仙翁百代豪一笑邊人那辦此
當年嵇阮尚餉糟

望都

縣人多癯婦人尤甚相傳縣東接唐縣病癯
者甚衆此縣蓋染其風土縣西有小阜曰由

山

荒寺踈鐘解客鞍由山東畔白烟寒望都風土連唐縣

翁媼排門帶癭看

安肅軍

舊梁門三城今惟一城
有人烟澹灤皆涸矣

從古銅門控朔方南城烟火北城荒臺家抵死爭澹灤

滿眼秋蕪襯夕陽

出塞路

安肅北門外大道
容數車方軌

當年玉帛聘遼陽出塞曾歌此路長漢節重尋舊車轍
插天猶有萬垂楊

白溝

在安肅北十五里關纔丈餘古亦
名巨馬河本朝與遼人分界處

高陵深谷變遷中
佛劫仙塵事事空
一水涓流獨如帶
天應留作漢提封

太行

渡河即與太行俱北至燕猶未斷大抵東至薊門北至塞北西接奚界也若晴日無埃則

出京至封丘已望見之矣

西北浮雲捲暮秋
太行南麓照封丘
橫峰側嶺知多少
行到燕山翠未休

固城

自白溝十五里至固城鎮舊遼界也水味極惡用柳作大捲汲井謂之涼罐

柳捲涼罐汲泉遙
味苦仍鹹似海潮
却憶徑山龍井水

一杯洗眼洞層霄

范陽驛

涿州驛牆外有尼寺二鐵塔夾塗如雪俯瞰驛中

郵亭偃仄但宜冬
恰似披裘坐土空
枕上驚回丹闕夢
屋頭白塔滿鈴風

定興

舊黃村金人建為縣井邑未成

新城遷次少人烟
桑柘中間井徑寒
亦有染人來賣纈
淡紅深碧挂長竿

清遠店

定興縣中客邸前有婢兩頰刺逃走字云是王家私自黥涅雖殺之不禁

女僮流汗逐氈毼云在淮鄉有父兄屠婢殺奴官不問
大書黥面罰猶輕

琉璃河

又名劉李河在涿州北三十里極清
泚茂林環之尤多鴛鴦千百為羣

烟林蔥蒨帶回塘橋眼驚人失眠鄉健起褰帷指病眼

琉璃河上看鴛鴦

此河大中祥符間路振乘輶錄亦謂
琉璃河惟嘉祐中宋敏求入番錄乃

謂之六里河語音
相近難得其真

灰洞

在涿北燕南之間兩旁皆高岡無風
而路極狹塵土坳積咫尺不辨人物

塞北風沙漲帽檐路經灰洞十分添據鞍莫問塵多少

馬耳冥濛不見尖

良鄉

燕山屬邑驛中供金粟梨天生子皆珍果又有易州栗甚小而甘

新寒凍指似排籤村酒雖酸未可嫌紫爛山梨紅皺棗
總輸易栗十分甜

盧溝

去燕山三十五里金以沽鴈餉客積數十隻至此放之河中金法五百里內禁採捕故也

草草魚梁枕水低忽忽小駐濯連漪河邊服匿多生口

長記輶車放鴈時

此河宋敏求謂之蘆菰即桑乾河也今呼盧溝

燕賓館

燕山城外館也至是適以重陽金重此節以其日祭天伴使把菊酌酒相勸西望諸

山皆縞云初
六日大雪


九日朝天種落驩也將佳節勸杯盤
苦寒不似東籬下雪滿西山把菊看

會同館

燕山客館也授館之明日
守吏微言有議留使人者

萬里孤臣致命秋此身何止一漚浮
提攜漢節同生死休問羝羊解乳不

遼人館本朝使
已謂之會同館



石湖詩集卷十二

欽定四庫全書

集部

石湖詩集卷十三至

詳校官庶吉士臣陳若霖

主事臣呂雲棟覆勘

總校官庶吉士臣何思鈞

校對官編修臣勵守謙

謄錄監生臣邵敬修

欽定四庫全書

石湖詩集卷十三

宋 范成大 撰

與吳興薛士隆使君遊弁山石林先生故居

此卷乾道

壬辰冬赴廣西道中
所作舊名南征小集

白蘋有嘉招蒼弁得勝踐會心不憚遠乘興恐失便籃
輿犯窮臘共作忍寒面溟濛雲釀雪浩蕩風落鴈松篁
漸清幽猿鶴或悲怨英英文章公作舍鎖蔥蒨峴峰俯

前榮佳木秀諸院窮搜發山骨林立侍談讌西巖踞熊
虎東巖峙屏案履綦故仿佛蓋瓦已零亂經營三十年
成毀一飛電摩挲土花碧小立為三歎

自石林回過小玲瓏巖竇益奇昔為富人吳氏所
有今一子尚幼山檢校於官

一丘乃中虛洞穴四無礙却略巖岫杳黝糾石狀怪蒼
牛飲前池碧罅灑微瀨雕鏤具百巧圖畫窘千態哀湍
寫壞磴凍雨濕空翠踈梅照草棘瘦竹拔蹊隧當時閭

閻子目力在塵外孤童藐難料竒事疑有待誰歟千金
捐來換把茅蓋不仙亦足豪衆垓皆累塊我評北山遊
勝絕此無對玲瓏詎可小孰能為之大

濯纓亭在吳興南門外

淒風急雨脫然晴當道橫山似見迎野水茫茫何用許
爛供遊子濯塵纓

乾道己丑守括被召再過釣臺自和十年前小詩
刻之柱間後五年自西掖帥桂林癸巳元日雪晴

復過之再用舊韻三絕

浮生渺渺但飛埃問訊星宮又獨來天上人間最高處
為君題作鬱蕭臺

拙疎何計補涓埃慚愧雙旌去復來三過溪門今老矣
病無脚力更登臺

界天山雪淨黃埃溪上扁舟夜汎來匝地東風勸椒酒
山頭今日是春臺

玉山道中

常山多清溪玉山富喬木行色鬱蒼然頗亦慰愁目
梅花隔籬見瓏璵照茅屋晚來風刮地想見飄香玉

桃花壇下望龜峰

石壇無土謾嵌岑何自能生小柏林擬擘蛤蜊龜殼上
病來不殺嬾登臨

清音堂與趙德莊太常小飲在餘干琵琶洲傍洲
以形似得名

曲浦彎環繞縣青一盃間客雨飄零琵琶不語蒼烟暮

山水清音著意聽

過鄱陽湖次游子明韻

春工釀雪無端密大塊囊風不肯收
休問巉巖與欹側
我今茅靡共波流
野鷹兀兀平沙上
折葦蕭蕭古渡頭
滿眼荒寒底處所
令人腸斷五湖舟

豫章南浦亭泊舟二首

繡檻臨滄渚
牙樯插暮沙
浦雲沉斷鴈
江雨入昏鴉
野曠天何近
春寒歲未華
來朝風一席
隨處且浮家

閨歲花光晚霜朝草色荒
趁墟猶市井收潦再耕桑
客路東西懶江流日夜忙
長歌情不盡一酌酹滄浪

清江道中橘園甚夥

芳林不斷清江曲倒影入江
江水綠未論萬戶比封君
瓦屋人家衣食足暑風汎花
蘭芷香秋日籬落明青黃
客舟來遲佳景盡但見碧樹
愁春霜

清江臺在臨江郡圃西岡上張安國題榜

南來富壽岡形勝此蟠結
岑坼戴高臺欄檻了風月
蕭

灘曳長烟閣阜炯殘雪江流當帶橫練練浮木末天風
來無鄉萬里吹醉顙登臨信奇事忍凍亦癡絕故人春
夢覺遺墨秋蛇掣浮雲真可咍揮解酌空闊

自冬徂春道中多雨至臨江宜春之間特甚遂作
苦語

客行無晴時淅淅如漏天東吳至西江舊歲接新年蠟
屐驚踵決油衣笑鶉懸掀淖起復仆頃步如重關略似
鴨與猪汨沒泥水闌我塗未渠窮一晴愧天慳倒塔橋

已斷壁破渡無船路人相告語未到先長歎薄晚得磽
确稍入袁州山不辭石齧足聊免泥沒羈自古行路吟
聽者凋朱顏軒渠尚能賦詩人類癡頑

玉虛觀去宜春二十五里許君上升時飛白茅數
葉以賜王長史王以宅為觀觀旁至今有仙茅
極異常草備五味尤辛辣云久食可仙道士煮
湯以設客

白雲堆裏白茅飛香味芳辛勝五芝採葉煮泉摩腹去

全勝石髓畏風吹

入分宜

新喻渡無橋分宜橋有欄孰歟兩徵吏賢否已判然堂
上著威信四郊如目前入國政可知茲焉略闕觀

方竹杖

竹君箇箇面團團此士剛方獨凜然外貌中心俱壁立
任從癡子削教圓

游仰山謁小釋迦塔訪孚惠二王遺蹟贈長老混

融

堵田溪淵清洄洄梅洲問路寒雲堆連空磴道虬尾滑
竹輿直上無梯階蒼官來迎夾道立相逢無言心眼開
翠微中斷雪礪吼兩耳不辨供喧飀林間靜極成斷相
政要萬壑號風雷山如蓮盆繞金地龍官避席餘蒼崖
祖師抱膝坐古塔大禪海浪翻天來騰空狡獪我未暇
拄杖踏濕撞莓苔問龍亦借一席地解包聽雨眠西齋
當年公案忌錯舉神通佛法同坑埋混融菴中的的意

笑我古本空崔巍茲事且置飽喫飯梯田米賤如黃埃
大雨宿仰山翌旦驟霽混融云無乃開仰山之雲

乎出山道中作此寄混融

誰開大仰雲此豈吾力及日光千丈毫彈指衆峰立衡
山捲陰氣海市發冬蟄韓蘇兩枯魚出語自濡濕人厄
與天窮底用苦封執但喜拄杖俊仍欣芒屨蒞向來三
尺泥有足似羈馮龍淵古橋皺獺徑寒溜泣

龍淵獺徑
皆山中佳

迹春淺山容瘦風餐澗聲急一簞寄前村野藪旋收拾

貓頭髯筍尖雀舌剝茶粒土毛冠江西斗酒況可挹聊
同一笑繁緩賦百憂集

初入湖南醴陵界

崖樹陰陰夾暝途出山歡喜見平蕪一春客夢飽風雨
行盡江南聞鷓鴣

醴陵驛

綠水橋通縣

縣前浮橋名

門前柳已黃人稀山木壽土瘦水

泉香乍脫泥中滑還嗟堠子長檣州何日到鼓枹上滄

浪

湘潭道中詠芳草

積雨倏然晴秀野若新沐芳草徑寸姿中有不勝綠萋萋
路傍情頗亦念幽獨驅馬去不顧斷腸招隱曲

初見山花

三日晴泥尚沒鞞幾將風雨過年華湘東二月春纔到
恰有山櫻一樹花

儲洲道中

烟凝山如影雲寒日射毫桃間紅樹迴麥裏綠叢高客
子歎游倦田家甘作勞乘除吾尚可未擬賦離騷

浮湘行

湘山中間湘水橫綠蘋葉齊春漲生盤渦沄沄去無聲
吾乘桂舟泝中溜揚波擊汰雙撻擗輓轡引竿如牛鳴
篙師絕叫疊鼓轟潛魚跳奔乳猿驚煖烟浮空晝夢騰
山長水遠天無情吹簫拊瑟弔湘靈水妃風御續來迎
問客良苦遠征行昨者斧鉞下青冥命我盡護安南兵

嶺海一視如王庭布蕩陽春濯腐腥王事靡盬來有程
匪躬之故惟爾毗芳洲杜若空青青九歌淒悲不可聽
願賡楚調歸和平

湘江洲尾快風挂帆

船頭雪浪吼奔雷十丈高帆滿意開我自只憑忠信力
風應不為世情來兒童屢惜峰巒過將士猶教鼓笛催
明日祝融天柱去更煩先捲亂雲堆

泊湘江魚口灘

知時杜燕語橋竿游子奔波自鮮歡
趁客賣魚雙漿急
隔林沽酒小旗寒
瀟湘渾似日南落
嶽麓已從天外看
薄暮灘前收百丈
卧聞三老報平安

謁南嶽

湘中固多山
夾岸萬馬屯
坡陀無敢高
似遜喬嶽尊
曉投望雲亭
衆丘拱牆藩
濃嵐忽飄蕩
積翠浮雲端
天柱已峻極
祝融更高寒
紫蓋鬱當中
固勢洶崩奔
峙為赤帝峰
下直宮墻垣
角樓捧雙闕
圓方模九閭
炎符撫中

興南正實司天草木薰協氣山林奠神姦妥靈有備物
龍卷鸞旗軒走泰桂林伯興神俱南轅上謁禮亦宜為
國憂元元心空禍福相古井寒無瀾杯琰不用擲但願
歸田園相傳壁畫好拂拭塵埃昏弓刀立壯士劔珮班
靈官後宮行樂處窈窕千雲鬟錦地舞月晝珠攏侍春

閑武氏筆已絕梗概猶清妍

後宮壁畫武洞清筆極禁
藥富貴之趣紹興二十年

火後為兩所敗後人摹
舊蹟更畫猶有彷彿

旋車闔廟去頗厭山市喧勝果

招客遊徑排集賢關梵度絢雜組

衡嶽藏經皆錦絲竹
廉護之孟蜀時捨簾

乃其戶部侍

郎彬所造

錫杖鐔古鑲

開山善果尊者所遺

避雨勝業閣

在嶽祠之

南

晚晴留凭欄石廩映岫嶺望眼增孱顏上封眇孤絕

南臺半雲烟碧岫有靈藥朱陵巢洞仙

晚晴乃盡見諸峰

病倦

懶幽討山僧鐫我頑松膠唐季枝拍跼隋初根竒事不

勝紀重遊當細論

廟路三十里夾岸大松五季時馬氏所植勝業寺拍不見根偃於地出八

榦龍蟠占數畝世所未之見傳為隋時物

兩蟲

鷓鴣憂兄行不得杜宇勸客不如歸天涯羈思難繪畫

惟有兩蟲相發揮

衡陽道中二絕

桑下蕪菁晚高花出短籬茅簷少春事惟記浴蠶時
黑殺鑽籬破花猪突戶開空山竹瓦屋猶有燕飛來

衡州石鼓書院

古磴浮滄渚新甍鎖碧蘿要津山獨立巨壑水同波
俎豆彌文肅衣冠盛事多地靈鍾傑俊寧但拾儒科

合江亭

并序

合江亭即石鼓書院今為衡州學宮一峰特立踞兩
水之會湘水自右蒸水自左俱至亭下合為一江而東
有感而賦韓文公所謂淥淥不可唾者即此處今有
淥淥閣

石鼓鬱嵯峨截然踞滄洲有如古盟主勤王會諸侯蒸
湘伯叔國稟命會葵丘敢不承載書戮力朝宗周混為
同軌去崩奔不敢留宜哉百谷王博大無與儔擅髦昔
亂華車馬隔中州未聞齊晉勲包茅費誅求桓文亦弘

規尚取童子羞安知千載後但泣新亭囚我題石鼓詩
願言續春秋

沈家店道傍棣棠花

乍晴芳草競懷新誰種幽花隔路塵綠地縷金羅結帶
為誰開放可憐春

邵陽口路麤惡積雨餘寧難行

平生春夢境俛仰撫八極湖南天盡頭夢亦未常識豈
知多病身今乃著脚歷山泉澄不清崖土壘而赤坳堂

滑勝油累塊硬逾石貪夫一回顧壯士三歎息不知清淑
氣果復曾鬱積我豈鄙夷之短咏聊一劇

馬鞍驛飯罷縱步

食飽倦輿馬散策步前岡意行踏芳草蕭艾蒨生香春
事甚寂寥山桃帶松篁游蜂入菜花此豈堪蜜房今年
蠶出遲拓葉分寸長好晴纔數日歲事未渠央

黃巖嶺

薄遊每違已茲行遂登危峻阪盪胸立恍若對鏡窺傳

呼半空響濛濛上烟霏木末見前驅可望不可追躋攀
百千盤有頃身及之白雲巨攬擷但覺沾人衣高木傲
燒痕蔥蘢茁新蕖春禽斷不到惟有蜀魄啼謂非人所
寰居然見鋤犁山農如木客上下翔以飛寧知有康莊
生死安嶮巖室屋了無處恐尚槽巢栖安得拔汝出王
路方清夷

衡永之間山路艱澁薄晚吏卒闕云漸近祁陽路
已平夷皆有津津之色

朝登赤土嶺暮入黃泥谷春江弄花月歸夢恍在目覺
來行路難杜宇叫高木凹中泥沒踝凸處石齧足坐輿
我尚病想見肩輿僕衡陽復祁陽可暫不可宿晚來出
前岡路坦亭堠促將士走相賀喜色如膏沐人生本無悶
逆境要先熟不從憂患來安識平為福夷塗不常遇歷
險始知足

書浯溪中興碑後

并序

乾道癸巳春三月余自西掖出守桂林九日渡湘江游

浯溪摩挲中興石刻洎唐元和至今遊客所題竊謂
四詩各有定體頌者美盛德之形容以其成功告於神
明者也商周魯之遺篇可以槩見今元子乃以魯史
筆法婉辭含譏蓋之而章後來詞人復發明呈露之
則夫磨崖之碑乃一罪案何頌之有竊以為未安題
五十六字刻之石傍興來者共商略之此詩之出必
有相詬病者謂不合題破次山碑此亦習俗固陋不
能越拘攣之見耳余義正詞直不暇卹也

三頌遺音和者希
丰容寧有刺譏辭
絕憐元子春秋法
都寓唐家清廟詩
歌詠當諧琴搏拊
策書自管壁瑕疵
紛紛健筆剛題破
從此磨崖不是碑

愚溪在零陵城對岸
渡江即至溪甚狹
一石澗耳蓋
衆山之水流
出湘中

一水彎環羅帶闊
千古零陵擅風月
取名如許安得愚
因病成妍却奇絕
至今鏡淨不可唾
猶恐先生遺翰墨
澤及溪流不庇身
付與後來商巧拙
我欲扁舟窮石澗

春漲未生寒瀨咽紛紅駭綠四山空惟有風篁韻騷屑
清溪東去客西征鉤鉤潭潭邊聊駐節何時隨汝下瀟湘
歸路三千櫓伊軋

鉤鉤潭邊斗也
潭形似之

宿清湘城外田家

驅馬力猶彊奏牀身始疲浮浮雲拂帳滴滴水鳴籬未
熟燈前夢閑尋道上詩湘中多夜雨客枕最先知

宿深溪驛去廣右界只一程

北戶書頻到南雲鴈不飛試評騎馬路何似釣魚磯擊

拆黃茅店篝燈白竹扉故園桑柘煖亦有稻梁肥

石湖詩集卷十三

欽定四庫全書

石湖詩集卷十四

宋 范成大 撰

晚春二首

以下桂林作
舊在乙稿

靜極聞檐珮
慵來愛枕幃
隙虹飛永晝
簾影碎斜暉
燕踏花枝語
蜂縈柳絮歸
輕颺宜白紵
時節近清微

好事憐春老
無愁耐日長
爐烟驚扇影
酒面舞花光
照水雲容嬾
移牀竹意涼
更煩紅槿帽
促拍打山香

紅苴薹花

綠葉蕉心展紅苞竹籜披貫珠垂寶珞剪綵倒鸞枝且
入花欄品休論藥裏宜南方草木狀為爾首題詩

偶題

檐雨初乾團扇風夕陽芳樹綠蔥蔥蕉心榴萼俱無賴
要與春衫相並紅

次韻郭季勇機宜雪觀席上留別

勝絕尊前萬事休縱非吾土且登樓山迎雨脚俄飛過

風約江聲欲倒流野水漸堪添酒面夕陽依舊滿簾鉤
憑闌從此遲歸鞅能及中秋對月不

次韻許季韶通判雪觀席上

把酒臨風瑞露傾瓊漿何用謁雲英捲簾雨脚銀絲挂
倚杖江頭綠漲生嶺海一涼蘇暑病山林千籟試秋聲
茲遊奇絕忘羈宦慚愧烟中短棹橫

送周直夫教授歸永嘉

青燈相對話儒酸老去羈遊自鮮歡昨夜榕溪三寸雨

今朝桂嶺十分寒
知心海內向來少
解手天涯良獨難
一笑不須論聚散
少馬吾亦跨歸鞍

贈趙廉州

馬羣雜沓草蒙茸
刮目權奇一洗空
天末也煩行李到
歲寒聊得酒尊同
梅花夜夜湘南雨
榕葉年年海北風
少待佳晴看山去
玉簪高插翠雲叢

去年過弋陽訪趙
恂道通判話西湖
舊遊因題小詩近
忽刻石寄來謾錄

紅塵寶馬碧湖船一夢如今費十年却照清溪尋綠鬢
但餘衰雪兩蕭然

送唐彥博宰安豐兼寄呈淮西帥趙渭師郎中

唐子皦自鮮水清石粼粼繡腸五車書不鄙簿領塵黔
山與桂嶺一笑二十春天涯會面難歲晚情話真五管
無賢侯但有嵐烟昏此豈功名場往戌清淮濱北門詩
書帥平生吾故人問訊今何如凌烟上星辰為言落南
客病作寒蟬呻飄飄北歸夢夜繞吳淞雲

燕堂後盧橘一株冬前先開極香

盧橘花殘細細飛滿枝晴日闌峰兒霜餘有此香無奈
合與稱題賦小詩

乾道癸巳臘後二日桂林大雪尺餘郡人云前此
未省見也郭季勇機宜賦古風為賀次其韻

憶昔北征秋遇雪穹廬苦寒不堪說飛花如席暗燕然
把酒悲歌度佳節異邦館客類西河鐫戶不容浮蟻泄
當時已分餐鹽草寧復夢遊炎嶺熱忽逐梅花行萬里

又與故山輕話別天公恐我愁瘴霧十日號風吹石裂
同雲乃肯度嚴關一夜玉峰高巖嶸老榕蔦密最先縞
穉竹枵虛時一折須知桂海接蓬瀛滿目三山白銀闕
不管樓高翠袖單但嫌酒淺金杯凸東郭先生履雖敝
詩情却鬪冰壺潔歸撚凍髭搜好句山館青燈對明滅
為憐叶氣到黃茅何止森森松柏悅豐年作守會飽煖
羈宦思歸自愁絕豈無菊徑樂琴書亦有秫田供麴蘖
東岡雪後一犁春誰在陂頭憶調燮

次韻陳仲思經屬西峰觀雪

仙人灕江遊剪水馮夷宮賓友來鄒枚寒轡搖冬瓏起
望天南陸玉沙滿長風越人未省識把酒酹層空從來
嶠南北人謂將無同那知梁園霰飛入瑞露中幕府有
清士尋僧上西峰六花信娟巧未及五字工我亦滌冰
硯課虛貴新功莫嗤兩臞儒毫端尚清豐

喜雪示桂人

臘雪同雲嶺外稀南人北客盡冬衣從今老杜詩猶信

梅片飛時雪也飛

寄題商華叔心遠堂用卷中韻

示我新詩卷知君邈俗情
安流視巫峽灰劫笑昆明
微外夜絃語甕頭春
蟻生藍橋即仙窟何況有雲英

送郭季勇同年歸衡山

天壤郭有道文獻今在茲
啄啄家雞羣見子野鶴姿
塵籠萬里心擇食中夜飢
拙宦避捷徑瘴風吹鬢絲
平生杏園友把酒天南陲
何敢吏朱浮但喜見紫芝
問君今

何適舊園餘荒畦提攜漢陰甕歲晚俱忘機勿開衡山
雲恐驚隱淪棲定肯從君遊歲晚攀桂枝我亦理吳榜
春湘綠蘋齊風蒲為誰落之子同襟期丁寧祝融峰將
迎兩枯藜一望五千里共洗蠻烟悲

甲午歲朝寓桂林記去年是日泊桐江謁嚴子陵
祠迤邐度嶺感懷賦詩

去年曉纜解江臯也把屠蘇泛濁醪一席飽風漁浦闊
千山封雪釣臺高將軍老矣鳴孤劍客子歸哉咏大刀

早晚扁舟尋舊路
柁樓吹笛破雲濤

癸水亭落成示坐客長老之記曰
癸水繞東城永
不見刀兵余作亭於水上其詳具記中

天將福地鞏嚴城
形勝山川表裏明
舊說桂林無瘴氣
今知灘水辟刀兵
雲深銅柱邊聲樂
月冷珠池海面平
願挽江流接河漢
為君直北洗欃槍

緩帶軒獨坐

午日烘開荳蔻苞
檐塵飛動雀爭巢
蒙蒙困眼無安處

閒送爐烟到竹梢

食罷書字

甲子霖霖雨東南濕蟄風荔枝梅子綠荳蔻杏花紅捫

腹蠻茶快扶頭老酒中荒隅經歲客土俗漸相通

蠻茶出修

仁大治頭風老酒
數年酒南人珍之

次韻平江韓子師侍郎見寄三首

自古四愁湘水深誰將城郭啓山林有情碧嶂團欒繞
無數朱樓縹緲臨蛄鼓揭天驚客坐象鰲航海厭蠻琛

三千客路長安遠故舊書來直萬金

南人以蚺蛇皮作腰鼓響徹異常交

趾以象革為兜鑿皆異事

靈泉杖屨浙江頭經濟長懷尚典州堂上讀書朝氣興

臺前呼月海光浮交情尺素勤雙鯉筆力枯松挽萬牛

已把三章翻樂府為君擊節變蠻謳

子師新作小築於浙江號靈泉讀書

堂呼月臺皆其處也

前年衝雪過雙溪風帽泥韉騎吹隨爛醉依前逢錦瑟

好音惟是欠黃鸝功名未試玉璫玦離別頻傾金屈卮

疇昔北征煩吉夢南征合有夢歸時

頃年北使時朝野多妄傳被留不歸

子師家中人忽夢子歸翌日過界報到故未句及之驚驚子師家善歌者前年過發券滿已去

宜齋雨中

秀麥一番冷送梅三日霖綠肥新荔子紅浥舊蕉心映竹千絲舞垂檐一線斟終朝盤膝坐卑濕恐相侵

次韻許季韶通判水鄉席上

青山綠浦竹間明彷彿苕溪好處行解慍風來如故舊催詩雨作要將迎休兵幕府烏鳶樂熟稻邊城鼓笛聲

摹寫箇中須綵筆句成仍挾水雲清

水鄉酌別但能之主管能之將過石康

南郭河橋市井喧綠荷香處有江天一簾梅雨爐烟外
三疊陽關燭淚前馬耳西風君並海船頭北渚我歸田
後期只恐參商似且醉金槽四十絃

六月十五日夜汎西湖風月溫麗

暮曦金龜潭追隨今夕涼波紋挾月影搖蕩舞船窓夜
久四山高松桂黯以蒼長烟界巖腹浮空餘劒鋌棹夫

三弄笛跳魚翻素光我亦醉夢驚解纓濯滄浪多情芙
蕖風嫋嫋吹鬢霜會心有奇賞天涯此何方清潤不立
塵空明滿生香過清難久留俛俯墮渺茫

燕堂書事

歲稔齊鈴聞年深屋墜摧狸爭雷瓦過蝗化雨窓來盡
日風常籟無時地不梅耳邊情話少笑口若為開

酒邊二絕

團扇香中嫋嫋風斷腸聲裏看羞紅不須過處催乾盞

聽徹歌頭盞自空

日長繡倦酒紅潮
閒束羅巾理六么
新樣築毬花十八
丁寧小玉慢吹簫

枕上作

繞枕蚊相聒
翻釭鼠自忙
早衰秋夢亂
不寢曉更長
賦擬騷人屈
吟成病客莊
安心無可覓
隨處且為鄉

思歸再用枕上韻

老覺觸事懶
病添歸計忙
行年心已化
疇昔意空長
五

柳栗里宅百花錦城莊何時去檢校一棹水雲鄉

李正之提點行至郴用予忙字韻寄和荅

天涯逢我病秋晚送君忙感槩交情厚留連別恨長賓
筵猶雪觀客路已雲莊搖落郴江路應須憶醉鄉

曉出北郊

偈仄深巷中蔥蘢綠陰交山家不早起閉戶如藏逃濃
露蛻蟬咽小風飢燕高新渠厓涓流壞陂方怒號遐眴
病瘠土不肯昏作勞滅裂復滅裂晚秧如牛毛空餘朝

氣白浮浮濕弓刀官稱勸農使臨風首頻搔

甘雨應祈三絕

晚稻成苞未肯肥鵝鳩啼曉雨來時黃紬被冷初眠覺
先向芭蕉葉上知

數日雖蒙霖霖霑塵終恨太廉纖今朝健起巡檐看
恰似廬山看水簾

高田一雨免飛埃上水網船亦可催說與東江津吏道
打量今晚漲痕來

與鄭少融趙養民二使者訪古訾家洲歸憩松關

二君欲助力興廢戲書此付長老善良以當疏頭

飄飄竹雨潤輕裘
嫋嫋松風繫小舟
安得從容興廢手

越人重上訾家洲

淳熙甲午桂林鹿鳴燕輒賦小詩少見勸駕之意

維南吾國最多儒
聳看招招赴隴書
竹實秋風辭穴鳳

桃花春浪脫淵魚
月宮移種新栽桂
江水朝宗舊鑿渠

況有狀頭坊井在
明年應表第三閭

郡人曹鄴及第詩
云我到月宮收得

種為君移向故園栽今歲用故事植桂正夏進德二堂
之下又復朝宗古渠以應文章應舉之識趙觀文王世
則亦郡人皆魁天
下故詩中悉及之

逍遙樓席上贈張邦達教授張癸未省闈門生也
同年進士俱會樓上者七人

疇昔金門看選賢一星終矣半英躔誰憐蠻府清池句
不著南山捷徑鞭作者七人茅瘴地肅霜九月菊殘天
浮生聚散如風雨同倚東樓豈偶然

畫工李友直為余作冰天桂海二圖冰天畫北使

渡黃河時桂海畫游佛子巖道中也戲題

許國無功浪著鞭，天教飽識漢山川。
酒邊蠻舞花低帽，夢裏胡笳雪沒韉。
收拾桑榆身老矣，追隨萍梗意茫然。
明朝重上歸田奏，更放岷江萬里船。

耳鳴戲題

歷歷從何起，泠泠與耳謀。
人言衰相現，我以妄心求。
遠磬山房夜，寒蛩隴樹秋。
圓通無別法，但自此根修。

復作耳鳴二首

至音豈寂透希夷珍重幽田為發揮妙用何關新卷葉
圓通自有倒聞機夢中鼓響生千偈覺後春聲失百非
寄語爵陰吞賊道玉牀安穩坐朱衣

東極空歌下始青西方寶網奏韶英不須路入兜元國
自有音聞室筏城牛蟻誰知牀下鬪雞蠅任向夢中鳴
如今却笑難陀種無耳何勞強聽聲

碧虛席上得趙養民運使寄詩約今晚可歸次韻
迓之

偶攜尊酒上孱顏，忽憶行人瘴霧間。
便好來分蒼石坐，已教不鎖翠雲關。

寒夜

萬象閒無語，一蛩吟獨譁。
蕭蕭月浸樹，滿庭穠李花。
風從月中來，吹我兩鬢華。
北斗聲迴環，南斗亦橫斜。
人生幾良夜，吾行久天涯。
離居隔江漢，何由寄疏麻。

甲午除夜猶在桂林，念致一弟使金，今夕當宿燕山會同館兄弟，南北萬里感悵成詩。

把酒新年一笑非鵲鴿原上巧相違墨濃雲瘴我猶住
席大雪花君未歸萬里關山燈自照五更風雨夢如飛
別離南北人誰免似此別離人亦稀

乙未元日用前韻書懷今年五十矣

浮生四十九俱非樓上行藏與願違縱有百年今過半
別無三策但當歸定中久已安心竟飽外何須食肉飛
若使一丘并一壑還鄉曲調儘依稀

儘乃俗字

再用前韻

時被命帥蜀

休論今昨總皆非世味誠甘與我違蜀道雖如履平地
杜鵑終勸不如歸三冬自苦坐毛穎一夢微官陪蟹飛
夜久南枝翻倦鵲茫茫月白衆星稀

與同僚遊栖霞洞極深遠中有數路相傳有通九
疑者燭將盡乃還飲碧虛上陳仲思用二華君
韻賦詩即席和之

竹杖芒屨俗網疎每逢絕勝更踟躕但隨岐路東西去
莫計光陰大小餘彷彿桃源猶舞鳳辛勤李白謾騎魚

今朝真作遊仙夢不似騷人賦子虛

施元光在崑山病中遠寄長句次韻荅之

四海飄蓬客舍邊幾多雲水與風烟絕無膂力驅長轡
空有孤忠誓大川參井忽隨征馬上斗牛應挂故山前
親交情話知何許詩到天涯喜欲顛

次韻趙養民碧虛坐上

已將山色染蒼黛更挽江波添酒罍珍重江山勸人醉
笑人驅馬惺惺迴

贛州明府楊同年挽歌詞二首

拱壁溫無類深蘭遠自芳清班孤玉荀薄宦老銅章傳
業麒麟子承家鴻鴈行門闌自簪笏吾獨憾堂堂
憶昔龍門化曾容鴈塔陪逡巡九閨過迢遞一書來未
報錯刀贈驚傳丹旆迴辰陽隔江渚空些楚詞哀

石湖詩集卷十四

欽定四庫全書

石湖詩集卷十五

宋 范成大 撰

初發桂林有出嶺之喜但病餘更覺登頓至靈川
疲甚自歎羸軀乃無一可偶陸融州有使來書
此寄之

桂林獨宜人無瘴古所傳北客守炎官恃此以泰然堂
高愜宴坐訟簡客佳眠不計身落南瘴柏三回天今朝

逐出嶺歎呼繫行纏置免脫豐草池魚躍清淵那知多
病身久靜反懷安長風蕩籃輿簾箔飄以翔靈泉路喫
蹶僕夫告頰肩我亦頭岑岑中若原蟻旋走投破驛宿
強飯不下咽茲事未渠央萬里蜀道難十年故倦游況
乃成華顛螭老當作繭不繭夫何言

甘棠驛

萬里三年醉嶺梅東風刮地馬頭迴心勞政拙無遺愛
慚向甘棠驛裏來

靈泉

驛後有龍惠泉

泉螭無語笑經過
欲拊莞繆奈拙何
孤奉明思雖出嶺
歡顏終少汗顏多

嚴關

或謂之炎氣逼人守險處朔雪多不入關關內外風關桂殊人以為南北之限也

回看瘴嶺已無憂
尚有嚴關限北州
裹飯長歌關外去
車如飛電馬如流

施進之追路出嚴關
且寫予真戲題其上

喚渡牂柯瘴水濱
嚴關關外又逢春
神仙富貴俱何在

且作全家出嶺人

興安乳洞有上中下三巖妙絕南州率同僚餞別

者二十一人游之

山水敦夙好煙霞痼奇懷向聞乳洞勝出嶺更徘徊雪
林縞萬李東風知我來華裾繡高原故人紛後陪繫馬
玉溪橋嵌根豁崔嵬蕩蕩碧瑤宮水泉漱壙隈芝田溉
石液深畦龍所開勾我一掬慳頻此炎州埃仍呼輪袍
舞醉倒瑞露盃但恐驚山林腰鼓轟春雷薪翁稚餉婦

圖視歡以怡茲巖何時鑒閱世幾劫灰始有此客往後
會真悠哉南游冠平生已去首猶同歲月可無紀三洞
俱磨崖會有好事者摩挲讀蒼苔

鐮觜

在興安縣五里所秦史祿所作也迎海陽水
疊石為壇前銳如鐮銜水分南北下為湘灘

二江功用奇偉予交
代李德遠嘗修之

導江自海陽至縣迺瀾迤狂瀾既奔傾中流遇鐮觜分
為兩道開南灘北湘水至今舟楫利楚粵徑萬里人謀
敘天造史祿所經始無謂秦無人虎鼠用否耳紫藤纏

金史四庫全書
卷十五
老蒼白石溜清泚是間可作社牡酒百世紀修廢者誰
與配以臨川李

大通界首驛

愚悃無華敢自欺寸誠珍重吏民知東風重倚庭前樹
送別人情似到時

陳仲思陳席珍李靜翁周直夫鄭夢授追路過大
通相送至羅江分袂留詩為別

相送不忍別更行一程路情知不可留猶勝輕別去二

陳拱連璧僊李瑚璉具周子雋拔俗鄭子秀風度嗟我
與五君曩如棲鳥聚偶投一林宿飄搖共風雨明發各
飛散後會渺何處栖鳥固無情我輩豈漫與班荆一炊
頃聽此昆弟語把酒不能觴有淚若兒女修程各著鞭
慷慨中夜舞功名在公等癯儒老農圃

懷桂林所思亭

簪山奇絕送歸時曾榜新亭號所思桂水抵今湘水外
他年空有四愁詩

羅江

嶺北初程分外貪驚心猶自怯晴嵐如何花木湘江上
也有黃茅似嶺南

初入湖湘懷南州諸官

今晨入湖南岡土絳以紫厥壤既殊異風氣當稱此回
思始安城舊籍贅楚尾實惟荊州隸零陵之南鄙時雪
度嚴關物色號清美倘以土宜觀尚非清相比何況引
而南焦茅數千里向我作牧時客過不停軌憧憧走官

下既至輒咎悔書來無別語但說瘴鄉鬼我今幸北轅
又念泉君子懷哉千金軀博此五斗米作詩諷方來南
游可以已車輪倘無角吾詩亦金祝

清湘縣郊外雜花盛開有懷石湖

午行清湘縣妍煖春事嘉柴荆開桃李冥冥一川花故
園豈少此愈此百倍加我寧不念歸顧作失木鴉百年
北窓涼安用天一涯君恩重喬嶽敢計征路賒鄉心與
官身鑿枘方聳牙橘柚走珍貢何如繫匏瓜明當復露

奏天日臨幽遐倘許清江使曳尾還汗邪

珠塘

未至清湘
二十里

茂林鳥鳥急坡長驢馱鳴坐輿猶足痺負笈想肩頰廢
廟藤遮合危橋竹織成路傍行役苦隨處有柴荆

題湘山大施堂

山中祖師號無量
壽真身塔在焉

重倚春林淚竹枝南游風物鬢成絲難尋桂海千峯夢
更了湘山一段奇來去別無心外法行藏休問塔中師
若論大施門前事竿木逢場且賦詩

清湘驛送祝賀州南歸

海內交情兩斷金，離歌倡和俱吳音。
桃花如雨暮春酒，竹箭有筠他日心。
萬里書來蜀道易，四愁詩成湘水深。
田園將蕪各蚤計，一棹五湖能見尋。

清湘驛送王柳州南歸二絕

南歸北去路茫茫，不是行人也斷腸。
可惜湘江春夜月，落花時節照離觴。

我已兼程無脚力，君猶追路有襟期。
從今月下共花下。

誰復醉吟先和詩

七里店口占

分手暮江寒徘徊立馬看尋常相見易倍覺別離難

全守支耀卿飲餞七里倅楊仲宣復攜具至深溪
酌別且乞余書走筆作此兼寄耀卿

店舍煙火寒塵沙亭堠遠媽紅糝芒綠春事亦已晚年
芳去踈踈江水來匆匆故人滿湘逢留落一笑莞已張
七里飲更出深溪餞草間艷紅粉竹裏趣廚俾故意如

許長由來共鄉縣愧我不能觴負此離歌轉別愁滿天
末不醉何由遣却憶支使君風前白波捲

深溪鋪中二絕追路寄呈元將仲顯二使君

賀州歸去柳州還分路千山與萬山把酒故人都別盡
今朝真箇出陽關

祇有南風捲路塵斷無南客送車輪故人合在瀟湘見
却向瀟湘別故人

戲題愚溪

碧湍激白石汙汙復湯湯既為人所愚安用爾許忙我
昔曾經過重來已三霜無事趺雙足奔走寧非狂溪流
到江平翻笑客路長豈不有歲晚乞身還故鄉

初泛瀟湘

六槳齊飛急下灘碧琉璃上雪花翻越來溪色清如此
只欠磯頭一釣竿

湘口夜泊南去零陵十里矣營水來自營道過零
陵下湘水自桂林之海陽至此與營會合為一

江

我從清湘發源來直送湘流入營水故人亭前合江處
暮夜檣竿矗沙尾却從湘口望湘南城郭山川恍難紀
萬壑千巖詩不徧惟有蒼苔痕屐齒三年瘴霧亦奇絕
浮世登臨如此幾湖南山色夾江來無復瑤簫插天起
坡陀狠石蹲清漲澹蕩光風浮白芷騷人魂散若為招
傷心極目春千里我亦江南轉蓬客白鳥愁煙思故壘
遠游雖好不如歸一聲鷓鴣花如洗

南臺瑞應閣用壁間張安國韻

衝雨上山頭臨雲看山脚松間一彈指開此寶樓間草
藥方費錢拂子不暇握小偈出雷音千古驚猿鶴

湘潭

暮雨檣竿縣一灣長官立馬水雲間風吹江沫浮浮去
誰在沙頭閉戶閒

泊長沙楚秀亭

雨從湘西來波動南楚門不知春漲高但怪江水渾舟

行風打頭陸行泥沒鞍且登裴公臺半日心眼寬

題嶽麓道鄉臺

山外江水黃江外滿城綠城外杳無際天低到平陸長
煙貫楚尾遠勢帶吳蜀故園東北望游子闌干曲

寄題潭帥王樞使佚老堂

孺子滄浪濯纓處千載新堂來卜鄰潦收無波徹底靜
東湖之水堂中人濛陽花譜勝洛下竹西藥闌來海瀕
新篁綠沉桂丹渥嶽立奇石蒼苔皴賞心滿眼伴閑戶

天風夜下扶車輪胸中種蠱妙經濟鬢鬚白雪朱顏春
蒼生未佚身未老斯堂未可忘斯民四年西略可萬世
孤撐獨立扛千鈞匹馬幡幡恃天日危言岌岌愁鬼神
浮生蚤休信不惡持此欲去非吾聞客游瀟湘逢騎吹
知公已為蒼生起公今少勞佚者多湛輩乃可寒江蓑

王公自言堂去東湖頃步新得彭州牡丹揚
州芍藥丹桂貓頭竹并徐氏五怪石列堂下

湘陰橋口市別游子明

馬首欲東舟欲西洞庭橋口暮寒時三年再別子輕去

萬里獨行吾蚤衰
遙憶美人湘水夢
側身西望劒門詩
老來不灑離亭淚
今日天涯老淚垂

竈渚

白魚出水臥銀刀
紫筍堆盤脫錦袍
捫腹將軍猶未快
棹船西岸摘萸蒿

大波林

湖路荒寒又險艱
大千空水我居間
篙師晚始分南北
指點青青漢口山

連日風作洞庭不可渡出赤沙湖

金沙堆前風未平赤沙湖邊波不驚客行但逐安穩去
三十六灣漲痕生滄洲寒食春亦到荻芽深碧萋萋青
汨羅水飽動荆渚嶽麓雨來昏洞庭大荒無依飛鳥絕
天地惟有孤舟行慷慨悲歌續楚些彷彿幽瑟迎湘靈
黃昏慘淡樣極浦雖有漁舍無人聲冬湖落濡此暫住
春潦怒長隨偏耕吾生一葉寄萬水况復搖落浮滄溟
漁蠻尚自有常處羈官方汝尤飄零

寄題贛江亭

陳季陵贛州書云新作此亭
泉使李正之題其榜要予詩

二水之會新作亭主人文章子墨卿我記斯亭且不朽
千載當與文俱鳴題榜誰歟漢使者風流好事飾儒雅
平生兩君吾故人安得繫馬亭堦下鼓旗西征上奔瀧
所思不見心難降瞿塘縱有文鱗雙愛莫致之章貢江
渚溪道中

江流去不定山石來無窮步步有勝處水清石玲瓏安
得扁舟繫絕壁臥聽漁童吹短笛弄水看山到月明過

盡行人不相識

夜泊灣舟大風雨未至衡州一百二十里

阿香攪客眠夜半驅疾雷空水受奇響如從船底來
嘈雨窓鬧軋軋風柁開睡魔走辟易耳界愁喧飗有頃
飄驟過灘聲獨鳴哀燈婢燭囊衣篙師理檣桅煩擾到
明發村雞亦喈喈

泊衡州

客裏仍哦對雨吟夜來星月曉還陰空江十日無春事

船到衡陽柳色深

步入衡山

應有人家住隔溪綠陰亭午但聞雞松根當路龍筋瘦
竹筍漫山鳳尾齊墨染深雲猶似瘴絲來小雨不成泥
更無騎吹喧相逐散誕閒身信馬蹄

重游南嶽

焚香鎮南殿過銓德觀醮注生祠庖觀道君玉符王七及八角玉印經方四寸

許文曰注生真君玉印雨中登山游南臺福嚴至瑞應擲鉢天柱諸峯之上寒甚病衰不至上封而返

捨舟得馬如馭氣步入青松三十里我從蠻嶺瘴煙來
不怕雨雲埋嶽趾憶昔南征款廟庭往來無恙神所祉
當時已有歸田願帝臨此心如白水煌煌南正館於東
手握八觚溫玉璽駿奔騫霍左右輔好生不殺扶炎紀
崇禋竣事曉壇空躋攀小試青鞋底不知雲磴幾千丈
但見漫山白龍尾石頭招我上南臺瑞應闌干天半倚
福嚴鐘聲過橋來彷彿三生如夢裏堂中尊者已先去
苔鎖巖扉何日啓竹嫌磽确老逾瘦松畏高寒蟠不起

癯儒尚病怕深登幽討未窮行且止我評七十二高峯
鬱律穹窿少觀美儼然可瞻不可玩往往雄爭如負宸
乃知嶽鎮蓋深厚不與他山爭秀偉區區獻狀眩兒童
乳洞淡巖真戲耳

四明人董嶧久居嶽市乞詩

祝融峯下兩逢春雨宿風餐老病身莫笑五湖萍梗客
海邊亦有未歸人

三月十五日華容湖尾看月出

雲銷灃陽風月生岳陽水誰推赤金盞湧出白銀地徘徊忽騰上蹉蹉恐顛墜稍高輪漸安飛彩到蓬背晶晶浪皆舞靨靨星欲避兜羅世界網普現無邊際官居東戶庭有眼如幻翳向非行大荒寧有此巨麗乘除較得失漂泊非左計妻孥競驩譁渠亦知許事

釣池口阻風迷失港道

回風打船失西東柁癡橈弱無適從三老號呼鐵纜墜
抬頭撾鼓驅魚龍千篙撐折百丈斷日暮稍與洪相通

推移尋尺力千里時有黃帽來言功康莊大達世不乏
乃獨蹇產濤波中一官橫起險易相剋那憂喜隨兒童
漲湖連天遠目斷且復加飯追萍蓬蒲團坐煖看香篆
作止任滅如頑空

鼎河口枕上作

漂泊離巢燕彎弓踰負殼蝸瘦嫌莞席硬老覺畫屏奢報
道帆當落傳呼鼓已撾且投人處宿未到已聞簷

安鄉縣西晚泊

水濶鳥鳥倦墟寒童僕飢一灣村縣過百折暮江遲曉
夢孤燈見春陰病骨知簡書寧不畏旅力奈先疲

澧陽江

順流下沅江湖流上澧浦水深蘭芷寒漂搖憚風雨采
采不盈掬何由寄遠渚洞庭浮天白迴矚莽吳楚有懷
獨晤歎榜聲與人語暮夜即維舟蒼茫定何許

澧浦

葦岸薺薺似碧城江船卷岸逆風行綠蘋白芷俱憔悴

惟有萋萋滿意生

澧江漁舍

安鄉澧陽之間自兵火後瘡殘猶未復

狡窟空來四十年沿江猶自少炊煙茫茫曠土無人問
蘆荻春深綠滿川

孫黃渡

自此登陸至公安渡江過沙頭

捨舟從陸更間關徑仄仍荒亦未乾棘刺近人牢閉眼
泥塗兀馬緊扶鞍茶山益數路程惡夢壠人家懷抱寬
擔僕輿夫盡劬瘁病翁那得更加餐

潺陵

舟橫攸河水馬滑潺陵道
百里無鉏犁閒田生春草
春草亦已瘦栖栖晚花少
落日見行人愁煙沒孤鳥老
翁雪髯鬢生長識羣盜
歸來四十年墟里迹如掃
莫訝土毛稀須知人力
橋生聚何當復茲事恐終
老人言古戰場瘡痕碎難
療誰使至此極天乎吾請
禱

將至公安

前村後村啼杜宇
伴人憂煎與人語
雲寒日薄春一夢

地澗天低淚如雨我馬虺隤我僕痛豈不懷歸畏簡書
公安縣前酒可沽不如且聽提胡盧

公安渡江

食罷雨方作起行泥已深伴愁多楚些吟病獨吳音莫
怨馬蹄滑須愁蠶事侵梅黃時節是未可決晴陰

荊渚堤上

原田何萋萋野水亂平楚大堤少人行誰與藝稷黍獨
木且百歲骭髀立水滸當年識兵燼見赦幾樵斧摩挲

欲問訊恨汝不能語薄暮有底茫茫沙頭聽鳴榔

渚宮野步題芳草

草色沐新雨綠潤如得意披拂欲生煙冉冉著巾袂天涯各芳春秦吳千萬里故人攀桂枝今夕念游子

發荊州

自此登舟
至夷陵

初上蓬籠竹竿船始知身是劍南官沙頭沽酒市樓煖
徑步買薪江墅寒自古秦吳稱絕國於今歸峽有名灘
千山萬水垂垂老只欠天西蜀道難

虎牙灘

又名金門十
二倍屬夷陵

傾崖溜雨色慘淡水墨畫辛夷碎花縣槐木老藤挂翠
莽楚甸窮黃流蜀江下一灘今始嘗三峽此其亞雨點
鼓士摻雲騰挽夫跨驚心度石林破眼見村舍牛眠草
色裏犬吠竹林罅步頭可擬船安穩睡殘夜

峽州至喜亭

斷崖臥水口連岡抱城樓下有吳蜀客櫓竿立滄洲雨
後漲江急黃濁如潮溝時見出峽船鐃鼓噪中流適從

稠灘來白狗連黃牛湍湫大如屋九死爭船頭人鮚尚
脫免虎牙不須憂

初入峽山欵孟東野

自此登陸
至秭歸

峽山偪而峻峽泉湍以礪峽草如氍毹毛峽樹多膠枝峽
禽惟杜鵑血吻日夜啼峽馬類黃狗不能長鳴嘶峽曉
虎跡多峽暮人跡稀峽路如登天猿鶴不敢梯僕夫負
嶠哭我亦呻吟悲悲吟不成章聊賡峽哀詩

土門

汙泥汨峻阪狠石臥中路睥睨無敢前
趑趄屢却顧長繩引籃輿前輓後推去
吏士更叫號作氣欲飛度顛墜較分寸
商略營趄步須臾氣亦竭一一汗如雨

桃花鋪

老巖漫山鳳尾張青楓直榦如攢槍
山深嵐重鼻酸楚石惡淖深神慘傷
陰崖風生吹客急草中枯株似人立
映晡卓幕先下程將士黃昏始相及

覆盆嶺

三登三降固始斷一步一休日欲斜濁酒半瓶不得煖
覆盆有鋪無漿家

小望州

峯頭高絕鄰四瞰若窺井小山萬蟻垤大山拊其頂叢
霄一握近罡風振衣冷似聞天人語笑我雪垂領曩侍
玉案香委佩太清境獨下赤城戲俯仰一枰頃豈其厭
晨華嗅此腥腐鼎揮手謝天人伶俜愧孤影來償繭足
債尚欠界天嶺老矣且勸游歸期行可請

大望州

望州山頭天四低東瞰夷陵西秭歸峽江微茫細如帶
江外千峯青打圍黃牛廟磯石如劈想看驚湍虎鬚白
水行陸走俱險難安得如鳥有羽翼

一百八盤

疇昔辭桂林自謂已出嶺蛻蟬蠻煙中恍若醉夢醒今
來峽山路步步躡雲頂仍聞蚯蚓瘴顧與嶠南等平生
行路難驚浪兀漂梗迷塗茲益遠鳥道非人境老矣法

當佚懷哉跡可屏拜手天東南並上歸田請

火墨坡下嶺

清晨入岑蔚嵐重寒颼颼忽聞黃鸝語方悟麥始秋旅
食法當瘦遠行人所愁况復深山中不與和氣游苦辛
那敢憚病悴良可憂徒憂亦無益聊作商聲謳

八場平聞猿

清猿泠泠鳴玉簫三聲兩聲高樹梢子母聯拳傳技去
忽作哀厲長鳴號天寒林深山石惡行人舉頭雙淚閣

雪澗琴心未足悲須寫峽中腸斷時

琴曲有雪澗聞猿

鑽天三里

非岡非嶺復非坡黃鵠不度吾經過
妻孥下行啼且笑聯手相攜如踏歌
風吹汗乾人力盡履齒與石方相磨
鑽天三里似千里四十八盤將奈何

蛇倒退


山前壁如削山後崖復斷
鼎吾達隴首如海到彼岸
那知下嶺處慄甚履冰戰
牽前帶相挽縋後衣盡綻
健倒

輒尋丈徐行塵分寸上疑綠竹竿下劇滾金彈豈惟蛇
退舍飛鳥望崖反稍喜一徑平猶有千石亂仍逢新燒
畬約畧似耕畔心知人境近顰末百憂散山民茹數把
鬼質犢子健腰鑱走迎客再拜復三歎謂非人所蹊官
來定何幹倘為飢火驅平地豈無飯意者官事迫如馬
就羈絆我乃不能答付以一笑粲

大了隘

峽行五程無聚落馬頭今日逢耕鑿麥苗踈瘦豆苗稀

椒葉尖新柘葉薄
家婦女布纏頭背負小兒
領垂瘤
山深生理却不乏
人有銀釵一雙插



石湖集卷十五